

大同縣志

卷十五 武事
卷十六 人物前

大同縣志卷十五

武事

自飲馬長城著於歌咏窮邊極塞舊為戎馬出沒之區我

國家承平日久人不知兵休養生聚未有盛於此時者也然好古

之士登單于臺而望龍堆日落風生歔歔憑弔李貳師霍嫖姚

之餘烈不且依依在目前哉生斯土與守斯土者若以為陳迹

而漫不加省焉則荒於古者其不能宜於今也固已

漢文帝四年匈奴絕和親大入雲中三萬騎殺掠甚眾漢使三將

軍屯北地代屯勾注趙屯飛狐口

元光元年十一月驃騎將軍李廣屯雲中

大同縣志

卷十五

武事

一

冬南部助漢扞戍當于骨都侯屯五原呼衍骨都侯屯雲中郎

氏骨都侯屯定襄栗籍骨都侯屯代左南將軍屯雁門皆領部

眾為郡縣偵邏耳目

六年遣輕車將軍公孫賀出雲中

本始四年遣前將軍韓增三萬餘騎出雲中塞千二百餘里至

烏員

師古曰地名也音云

斬首捕虜至侯山百餘級

師古曰侯山山名也於此山斬捕得人

虜馬牛羊二千餘

王莽遣厭難將軍陳欽震狄將軍王巡出雲中

建武十四年秋九月平城人賈丹殺盧芳將尹由來降

原註以平城屬

雲州蓋古雲州即雲中也並非今之定襄故省志載入大同府

永平十六年二月北部大入雲中塞烽火日通故事寇過五千人移書旁郡吏欲移書求救太守廉范不聽自率士卒拒之會日暮令軍士各交縛兩炬三頭爇火營中星列寇遙望火多謂漢救兵至大驚待旦將退范乃令軍中蓐食晨往赴之斬首數百級寇自相躡籍死者千餘人由此不敢復向雲中

陽嘉四年十月烏桓寇雲中遮截商賈牛車千餘兩度遼將軍耿華率二千餘人擊之不利又戰於沙南斬首五百烏桓遂圍華於蘭池乃發積射士二千人度遼營千人配上郡屯以討之

烏桓始退

後漢書沙南有蘭池烏桓圍耿華於此沙南縣漢屬雲中蘭池地右沙南

永壽二年秋

鮮卑檀石槐將三四千騎寇雲中

大同縣志

卷十五

武事

二

鮮卑檀石槐立廷於彈汗山去高柳三百餘里永壽二年七月寇雲中

熹平六年八月烏桓校尉夏育出高柳中郎將田晏出雲中中郎將臧旻率南匈奴出雁門各將萬騎出塞二千餘里鮮卑檀石槐逆戰育等大敗

魏雁門太守牽招鮮卑來犯輒摧破之又構間其大人步度歸泄歸泥等令與軻比能爲隙後漢建興四年招率歸泥擊比能於雲中故郡敗之時比能入居代郡矣

晉太元元年十二月秦兵破代置戍雲中

九年前秦寧朔將軍宋萬三千騎從雲中援秦姚萇邀擊萬大

敗之

後燕太元二十一年三月燕主慕容垂密發踰青嶺經天門鑿山開道出魏不意直指雲中後魏陳留公拓跋虔部落三萬餘家先鎮平城垂次獵嶺以遼西王農高陽王隆爲前鋒襲擊之時燕兵新敗皆畏魏惟龍城兵勇銳爭先虔素不設備徵兵未集閏月乙卯農等軍至平城乃覺虔率麾下邀擊敗死遂拔平城收其部衆三萬餘人魏主珪欲出走會垂寢疾乃還師

後魏始光元年宜城王奚斤將軍安原閭大肥出雲中白道至漠南

蠕蠕大檀寇雲中太武親討之三日二夜至雲中大檀騎圍太

大同縣志

卷十五

武事

三

武五十餘重騎逼馬首相次如堵焉士卒大懼太武顏色自若衆情乃安先是大檀弟大那與社崙爭國敗而來奔大檀以大那子於陟斤爲部帥軍士射於陟斤殺之大檀恐乃還

延和五年太武西伐沮渠牧犍宜都王穆壽輔景穆居守長樂王嵇敬建寧公崇二萬人鎮漠南以備蠕蠕吳提果犯塞壽素不設備賊至七介山京邑大駭爭奔中城司空長孫道生拒之於吐頽山會敬崇等破吳提兄乞列歸於陰山之北斬首萬餘級吳提聞而遁走道生追至漠南還

太和五年二月沙門法秀謀反伏誅

十九年定州刺史穆泰自陳病久乞爲恒州遂轉陸叡爲定州

以泰代焉泰不願遷都獻未及發而泰已至遂潛相扇誘圖爲變乃與獻及安樂侯元隆樂陵王思譽等謀推朔州刺史陽平王順爲主順僞許以安之密表其事遣任城王澄率并肆兵以討之澄遣治書侍御史李煥先單車入代宣示禍福泰自度必敗率麾下數百人攻煥郭門不克單馬走出城西爲人擒送澄亦尋到泰等皆伏誅高祖遷洛陽敕洛陽侯于烈鎮代京參委留臺庶政及穆泰之逆代鄉舊族同惡者多唯烈一宗無所染預

正光四年八月拔陵寇雲州魏雲州刺史費穆招撫離散四面拒敵時北境州鎮俱沒惟雲州一城獨存七年七月朔州鮮於

大同縣志

卷十五

武事

四

阿胡擁州流民東下攻魏平城城內開門應之行臺元纂奔冀州

隋仁壽元年行軍元帥楊素出雲州敗達頭可汗

元年正月突厥寇恒安遣柱國韓洪擊之官軍敗績平寇縣公李景適送義成公主至恒安鎮率所領數百人援之力戰三日殺虜甚衆

唐貞觀四年二月總管李靖繇馬邑任城王道宗出大同道幽州都督衛孝節出恒安道

永隆元年七月突厥寇雲中都督竇懷哲中郎將程務挺擊之

永淳元年十月突厥骨咄祿保總材山阿史德元珍爲謀主寇雲中都督薛仁貴出師邀擊之咄祿問唐將先鋒以仁貴告咄祿曰吾聞薛將軍流象州死久矣安得復生仁貴免胄見之突厥相視失色下馬羅拜稍稍遁去仁貴因進擊破之斬首萬級獲生口牛羊甚衆

乾符五年正月雲中兵馬使李盡忠等夜執防禦使段文楚雲中守捉使李克用以兵趣雲州行募兵得萬人次鬪雞臺城中執文楚至殺之遂進擊寧武陷岢嵐軍

中和元年改大同節度使爲雁門節度使移治代雲朔諸州屬之

大同縣志

卷十五

武事

五

四年割雲朔二州屬河東

大順元年二月李克用攻赫連鐸於雲州入東城東城今懷仁縣二年

七月李克用復攻雲州以騎將薛阿檀爲前軍設伏河上赫連

鐸出戰縱騎追薛阿檀抵河伏發鐸大敗奔吐渾克用遂入雲

州以石善友爲刺史

景福元年二月李克用畧地常山赫連鐸自吐渾入李匡威壁

雲州北郊克用自神堆引兵乘夜潛入雲州出戰走之神堆或曰卽黃

瓜堆天復中雲州刺史劉再立爲都將王敬暉所殺敬暉以雲州

地歸劉仁恭

五年河東節度使李克用遣通事康令德結好於遼太祖冬十

月太祖以騎兵七萬會克用於雲州宴酣克用借兵以報劉仁
恭木瓜澗之役太祖許之易袍馬約爲兄弟

太祖會克用於雲州時曷魯侍克用顧而壯之曰偉男子爲誰
太祖曰吾族曷魯也後曷魯爲阿魯敦于越阿魯敦者遼言盛
名也

耶律古從太祖畧地山右會李克用於雲中古侍克用異之曰
是兒骨相非常不宜使在左右以故太祖頗忌之後古亟建功
爲右皮室詳穩卒太祖曰古死如長松自倒非我伐之也

後唐天成四年四月契丹寇雲州

清泰元年十二月寇雲州

大同縣志

卷十五

武事

六

晉天福二年二月契丹主德光北歸至雲州大同彰國振武三節
度迎見皆留之不遣雲州判官吳巒集兵治具閉城自守不受
割地之命德光以兵圍之半歲不能下晉主召巒歸

遼神冊元年安瑞平雲州

天慶十年秋獵沙嶺冬復至西京

保大二年宋宣和四年也正月遼主延禧獵於鴛鴦灤聞金兵
至遂奔雲州

三月金粘沒喝敗遼兵於北安州獲其將衛習泥列因知遼主
在雲州宿衛單寡報其都統斜也曰機會不可失也於是斜也
出青嶺粘沒喝出瓢嶺遼主聞金師將至趨白水灤粘沒喝以

精騎襲之將近遼主行營遼主乃覺率輕騎走夾山

夾山在遼雲中北

主出奔使耿守忠救雲州金斜也與粘沒喝擊走之時雲州城西有浮圖遼兵據守更下射攻城者斜也曰必奪是城乃可下會金將斡魯鶻巴魯攻浮圖奪之以精銳下射城中城中震慄留守蕭察刺開門降

四年正月夏稱藩於金金以下寨以北陰山以南雲中之地二千里畀之雲中古雲中也

初金人約夏羗之請割拓跋故地雲中二千里遺之止以朔武二州歸宋宣和十一年夏人舉兵侵朔武界譚稹禦之不退金又以兵攻應蔚逐守臣又陷飛狐靈邱兩縣

大同縣志

卷十五

武事

七

宗翰等攻西京闍母婁室等於城東爲木洞以捍蔽矢石於北隅以芻茭塞其隍城中出兵萬餘將燒之温迪罕蒲匣率衆力戰執旗者被創蒲匣自執旗奮擊却之又爲四輪革車高出於堞闍母與麾下乘車先登諸軍繼之遂克西京與遼步騎五千戰於朔川之境斬首三百級復敗遼騎三百於河陰遼兵五千屯於馬邑縣南復擊破之隳其營壘盡得其車馬器械遼兵三萬列營於西京之西闍母以三千擊之使士卒皆去馬陣於溝塹之間曰以一擊十不致之死地不可使戰也謂衆曰若不勝敵不可以求生於是人皆殊死戰遼兵遂敗追至其營而止明日復敗其兵七百餘人

西京既降復叛時糧餉垂盡議欲罷攻宗雄曰西京都會也若委而去之則降者離心遼之餘黨與夏人得以窺伺矣乃立重賞以激士心既而夜中有火大如斗墜於城中宗雄曰此城破之象也及克西京賜宗雄黃金百兩衣十襲及奴婢等與宗翰等擊耿守忠兵七千於西京之東四十里大破之

宗翰襲遼主於五院司希尹爲前驅所將纔八騎與遼主戰一日三敗之明日希尹得降人麻哲言遼主在漠委輜重將奔西京幾及遼主於白水灤南遼主以輕騎遁去盡獲其內庫寶物遂至西京西京降使蒲察守之希尹至乙室部不及遼主而還西京未下總領左翼護衛夾谷謝奴獲城中生口乃知城中潛遣人求救於外都統府得爲之備却其救兵西京乃下

大同縣志

卷十五

武事

八

金大安二年八月留守胡沙虎及元木華黎戰於定安敗績元遂陷雲朔豐勝

三年十一月西京留守紇石烈胡沙虎棄西京走還京師是時西南至忻代皆歸元

貞祐三年三月壬午西京軍民變遣官撫諭之

元太祖七年秋圍西京金元帥左都監奧屯襄率師來援上遣兵誘至密谷口遂擊之盡殪復攻西京上中流矢遂撤圍

元西京郝道章陰結武仙抄掠州縣恒州元帥邸順擒殺之至正十八年二月黃河萬戶田豐降劉福通以曹濮兵轉掠而

西踰太行焚上黨遂掠晉冀雁門及大同諸州復大掠而南

三月辛酉大同諸縣陷

六月關先生破頭潘等分二道一出絳州一出沁州踰太行破遼州轉掠晉冀雁門之間至是復掠大同諸州及塞外諸路平章察罕帖木兒遣將關保擊却之

九月丙午賊兵攻大同路十月大同路陷達魯花赤完者帖木兒棄城遁

十月關先生南攻保定不下攻陷完州遂北掠塞外攻大同達魯花赤定者帖木兒棄城遁城陷

十九年二月孛羅帖木兒移鎮大同置大都督兵農司分爲十

大同縣志

卷十五

武事

九

道皆以孛羅領之孛羅率兵與關先生戰於雲中走之遂南向爭晉冀

三月詔孛羅帖木兒移兵至大同置大都督兵農司專督屯糧以孛羅帖木兒領之

二十二年三月孛羅帖木兒遣裨將也速不花等招兵五萬戍大同

二十三年御史大夫老的沙與知樞密院事禿堅帖木兒得罪皇太子皆奔大同孛羅帖木兒匿之軍中

二十四年四月戊辰擴廓帖木兒奉命討孛羅帖木兒屯兵冀寧其東道以白鎖住領兵二萬守禦京師其中道以貊高竹貞

領兵四萬西道以關保領軍五萬合擊之關保等兵逼大同李羅帖木兒留兵守大同而自率兵與老的沙禿堅帖木兒復大舉向闕

二十五年四月乙巳關保等進圍大同乙卯入大同

明洪武元年九月右丞薛顯叅政傅友德攻大同擒元喬右丞等三十四人以歸

二年正月副將軍常遇春率郭英湯和耿炳文汪興祖陳德謝成郭子興攻大同元右丞相擴廓帖木兒奔甘肅守將竹貞亦棄城遁遂取大同

七月元脫列伯孔興以重兵攻大同明李文忠師至太原聞之

大同縣志

卷十五

武事

十

率譚濟馮勝周顯繆美蕭壽孔禮等出雁門九月過馬邑抵梅峪口遇元邏騎數千敗之擒其平章劉帖本進次白陽門又擒四大王時雨雪文忠疑有伏自率數騎入山覘之會前軍去大同四十里止壁文忠至驚曰此豈駐兵地耶寇來敗矣麾之令前五里阻水而壁密遣人間行達城中與都督汪興祖期是夜脫列伯悉衆來攻文忠令將士秣馬蓐食堅壁不動以二營委敵督令死戰不之救自寅至辰度其饑疲乃分軍爲兩翼鼓行疾馳薄其陣聲撼林木城中亦開門出戰腹背奮擊大破之追至炭窖擒脫列伯降其衆萬餘輜重無算孔興走綏德隨進兵東勝州至莽哥倉而還

八年正月征虜大將軍馮勝出大同定未下散不刺地踰月還
三十二年燕王繇紫荊歷廣昌蔚州進收大同張玉朱能薛祿
陳亨亨子愆皆從

正統十四年夏也先謀入寇都督同知毛勝偕平鄉伯陳懷等
率京軍三萬鎮大同懷戰歿勝脫還

八月己酉上駐大同中官王振益欲北鎮守太監郭敬密告曰
北必墮敵計振始懼班師至雙寨雨甚振初議道紫荊關繇蔚
州邀上幸其第既恐蹂鄉稼復改道宣府紆迴奔走壬戌始次
土木瓦剌追至師大潰遂北狩振亦爲亂兵所殺

九月也先擁駕至使袁彬入城索金幣約賂至卽歸駕叅將郭

大同縣志

卷十五

武事

十一

英閉門不納而總兵劉安與侍郎沈固給事中孫祥知府霍瑄
等出謁以金幣進請如約也先笑不應是夕駕駐城西郭登謀
遣壯士劫敵迎駕入城不果明日敵擁駕去

冬寇六百騎逼城下總兵官郭登擊却之

景泰元年春也先自順聖川入駐沙窩登敗之追至栲栳山再
敗之得所掠人畜八百有奇封定襄伯自土木之敗邊將無敢
與敵戰至是登以八百騎破寇數千邊軍爲增氣

四月也先數千騎復奄至登出東門戰佯北誘之入土城伏起
敗之寇遂遁登度寇且復至令軍士齎毒酒羊豕楮錢僞祭塚
見敵佯走寇爭飲食死者甚衆

六月寇復以二千騎入登再擊却之

也先奉英宗至城外聲言送駕還登設計具朝服侯月城內伏兵城上俟駕入卽下月城 旣及門寇覺之遂擁駕去

天順中毛里孩據套分掠水泉營及朔州佩將軍印楊信屢却之寇遂東入大同六年信與副將徐恕叅將張瑛分道出塞遇敵戰胡柴堡敗之寇且戰且却復敗之獲馬五百餘匹

成化五年提督軍務王越選輕騎出孤店關俘敵於威寧海子十七年二月保國公朱永與太監汪直提督軍務王越出師大同禦亦思馬獲首功百二十

十八年春巡撫何喬新敗寇於灰溝

大同縣志

卷十五

武事

十二

十九年小王子大入總兵官永新伯許寧與巡撫郭鏜太監蔡新斂兵守別遣將劉寧董昇與周璽相犄角寇大掠焚代王別墅王趣戰至使衆哭於轅門寧憤激與鏜等營城外寇預伏兵以十餘人爲誘新麾下馳擊寧將士爭赴之遇伏大敗死者千餘人寧奔夏米莊鏜新疾馳入城會璽等來援寇乃退寧還陣亡婦女號呼詬詈擲以瓦礫寧由是喪氣寇去復入麾下劉寧宋澄莊鑑等禦之七戰寇始退

十九年七月寇入鎮兵戰不利

小王子入宣大告急以朱永爲鎮朔大將軍中官蔡新監其軍督諸將周玉李璵等擊敗之

亦思馬因大入大同總兵官許寧分遣副總兵周璽守懷仁寧與遊擊董昇營西山自將中軍擊之夏米莊敗績寧昇被圍數重幾陷亟發巨砲擊之敵多死圍乃解璽聞中軍失利亟還兵援夜遇敵乘勝前銳甚厲將士曰今日有進無退大呼陷陣敵少却久之短兵接臂中流矢拔鏃戰益急與子鵬及麾下壯士擊殺數十人會寧兵至中軍潰卒亦稍集敵乃退許寧等亦還二十一年督軍務余子俊請築長城五月都指揮顧綱以京營兵六千助役

宏治十三年火篩入大同平江伯陳銳等不能禦詔保國公朱暉等佩大將軍印代之

大同縣志

卷十五

武事

十三

嘉靖三年七月鎮兵殺巡撫都御史張文錦

十二年十月鎮兵殺總兵官李瑾總督劉源清都督郤永討之兵駐聚樂堡永趣鎮城南攻南關破之遂爲長圍以守賊乘間出突戰官兵數不利

源清令爲地道垂成爲賊所覺復引水灌城城土堅不隳時戶部郎中詹榮居憂不及出與遊擊戴廉指揮馬昇謀昇揚言曰官兵斷炭路城中凍甚詹郎中有信義盍挽之一出乞軍門諸叛不疑榮至軍計事畢復與兵部主事楚書謀令書賫詔入榮還給曰炭路許通然聞有天使賫赦至闔城或可生也昇復揚言天使至衆迎書入宣慰畢書出是夜昇與同盟分擒諸首惡

二十餘人斬之次日大軍退舍榮令開諸城門去備具迎巡撫都御史樊繼祖以入

尹九宮記十二年耕爲藁城令藁有張尚書子麟者家居一日鄉人至報大同之變耕走謁張因言下城策張曰此時只要朝廷主張果欲大懲之乘其未備募人入城縱火爲善又曰聞大同如渾河水去城近可灌也後聞用兵時穴地道決水注之城不隳因思宋史有太祖灌太原契丹使臣譏其不知俟涸之語疑之庚子耕改官歸父老謂耕曰兵已退數日水涸城乃隳於是知古今事勢不遠而人之智識才力有逮不逮也乙亥耕過東平謁故總督劉公源清語及灌城俟涸事劉公曰彼時實思不至此

大同縣志

卷十五

武事

十四

十三年正月叛兵遣邢通事勾寇吉囊青把都以五萬騎至官軍堅壁不敢戰而餉道繼絕聚樂堡兵與寇角不利永屯南城不能相援也中外大震諸叛欲盡納寇入城城中人不聽乃止已而寇自解去或曰有陝西遊擊某潛出塞襲其輜重寇聞之乃退

陝西梁震素知大同悍卒縱肆態十五年十月命爲大同鎮守總兵官率所親家丁三百輩馳至中嚴約束禁治私聚一軍大驚其家丁輩時時向鎮兵語曰爾敢蔑主將者恃其衆耳兒郎輩在此無不一當百五步之內恐爾不得用其衆鎮兵皆咋舌

十六年二月梁震出塞與俺答衆戰於玉林川廢宣寧縣斬百四十餘級三月又戰於紅崖兒斬百八十餘級十七年二月入安子山十八年閏七月俺答繇石窩溝入時五堡初就梁震禦却之七月又入總兵官周尚文禦之斬五十餘級內一人金帶錦裘二十三年九月入大同總督翟鵬禦却之二十四年和川奉國將軍充灼坐罪奪爵怨望乃與襄垣中尉充焮謀引寇入大同殺代王以舉事應州人羅廷璽與其黨王廷榮以白蓮教惑衆入見充灼爲妖言充灼因與畫計約奉小王子入居大同藉塞外兵攻雁門取平陽充灼爲王事定卽計殺小王子充灼然之先遣人持火箭焚大同草場五六所而令通塞外語者衛

大同縣志

卷十五

武事

十五

奉闌出邊總兵周尚文邏卒遮獲其所獻表物鞫實以聞充灼等伏誅

嘉靖二十九年俺答數萬騎入塞伏精銳谿谷中巡按御史胡宗憲信敵誘乘醉趣總兵張達出師達欲持重宗憲厲聲責之不得已率所部出達素勇敢好離營繞鬪至是憤怒挺身陷陣寇兵圍之數匝達左右突不得出副總兵林椿別擊零騎於彌陀山聞達急引兵西救一日三戰亦陷重圍矢如雨達椿俱死軍盡歿

三十一年三月詔仇鸞帥兵赴大同

三十二年二月寇入宣府閏三月大同副總兵郭都出戰死之

三十三年七月寇入大同官軍敗績十二月寇大同總督許論
巡撫王忬擊走之

三十四年十二月寇大入總兵馬芳擊却之

三十九年二月大同總兵劉漢自鎮河口出塞搗寇帳於灰河
斬首二十八級奪高駝一百七十餘隻時寇聚喜峯口外漢乘
虛攻其巢穴以牽制之寇果狼狽西顧自後各鎮往往乘間出
勦寇始有戒心遠徙其幕

四十二年寇犯龍鬚墩巡撫萬恭甫至伏兵擊却之

隆慶元年九月寇大同叅將劉國禦却之

甲申二月闖賊犯大同兵民皆欲降命城守不應總兵朱三樂

大同縣志

卷十五

武事

十六

自芻巡撫衛景瑗督理糧儲戶部郎中徐有聲朱家仕俱死之
李自成入大同六日殺代府宗室殆盡留僞將張天琳守之天
琳凶暴閱兩月陽和軍民約鎮城軍民內應殺天琳

按雲中兵革以

國朝順治戊子姜瓖之變爲最創細攷山西通志大同府志其起
事之本末俱未之載僅散見於宦績卷中各小傳殊令人致嘆
於文獻之無徵也其時大同令王度戡亂定變另有本傳以死
勤事之縣丞項一科兵備道宋子玉徐一范各以忠烈著亦載
本傳然當時尚有大同西路同知張肇斌渾源知州榮爾奇吏
目周官山陰典史施邦政得勝路叅將管一舉旗職佟養昇皆

兵圍城陷百戰不屈罵賊殉難爭光日月者也而高山守備梁化鳳善撫軍士懷仁典史李吐馨深得民心二人者危城獨保績尤偉焉故備誌於此復附錄長子縣志三則於後以見忠義之感人不朽且以待異日之參考云爾

附長子縣志三則

先是大同總兵姜瓖以城叛北地劫賊喬炳與屯留張斗光乘機僞稱姜瓖副將聚衆二百騎直抵城下招降土人衛銀常壽馬興等俱前官巨蠹懼罹於法炳光在先以術愚之潛通線索至是遂同爲內應知縣李允昇守正不從銀等竟掣鎖開門迎賊入劫官舍倉庫因各署將領職銜

以某生員王者佐爲僞知縣縛李允昇於郡中賊營而殺之時順治六年五月也及十月大兵恢復邑人急圖歸正衛銀常壽養成虎勢脅衆堅守據城不下至十一月初四日城破郭守邦曰余於此邑己丑之變而嘆亂賊之爲禍烈也以彼螳臂當車身死名滅自作之孽無足惜者惟是煽惑羣心威脅長上俾守土之臣肝腦塗地妻孥同盡而數萬生靈駢首就戮流毒至此其罪可勝誅哉余故直書其事以表李侯之臣節且以暴衛常諸賊不赦之罪云

霍燦曰余雲中馬邑人也姜瓖之變嘗聞其畧矣我朝初定燕京以雲中爲極邊要地特

命 親王勘閱環疑將有事於已也遂據鎮叛倡言恢復前朝
以鼓動人心噫環果忠於明者當五年前周將軍遇吉於
寧武關力戰却賊時何不與之戮力同心東西各當一面
乎既貪生歸附而反覆背叛至流言煽惑遠邇響應兵戈
之禍且由雲中以及上黨焉馬邑斗大孤城始亦人懷攜
貳逮

大兵克取朔州賴二三老成力排異說挺身歸順得以保全若
長子者但以三五梟獍脅從牽制遂奪無辜赤子悉就屠
戮嗚呼向背之際可不慎哉

通志府志俱載劉伏玘傳有謂伏玘非大同人者然因王三之
大同縣志
卷十五 武事
十八
亂而廷杖毛伯溫等見於明史事誠有之按人物傳中亦無所
位置故備錄於此

劉伏玘倜儻負氣節有伏玘素識者王三鼓衆爲變太原平定諸
郡邑重罹荼毒甲辰入紫荆關直抵完縣世宗震怒械繫中丞
朱方總制翟鵬罷大司馬毛伯溫杖死職方郎中韓君勗皆以
王三故也並懸賞格募能生擒王三者予千金陞官五級世世
繼襲伏玘憤曰吾家世食祿無寸報王三四夫敢作孽如此戮
妖醜報天子非玘不可請以死從事乃畱三子以養父母而自
攜妻女就道賣酒關口陰圖其事期年王三跨馬挾矢從四健
兒按轡關下問戍卒曰誰在此以伏玘對王三大喜促會玘亦

具壺觴出迎馬前王曰弟何爲在此玘曰貧不自給聊假釀酒
得升斗爲活計不圖今日見兄也因泣下王曰弟無慮我且富
貴忍使在此落拓乎伏玘歛涕酌酒爲壽三飲數盞卽覺微醺
顧謂伏玘吾欲至爾家少坐佯辭不得至則拜見伏玘妻女如
家人歡呼曰二嫂取好酒來吾與弟飲當以盡醉爲期且命健
兒取金遺之伏玘妻酌獻巨觥出禮健兒薄暮皆醉倒偃臥伏
玘與同行三卒將椎劈其兩臂並四健兒縛送總戎覆核無僞
檻詣京師上大悅置之法傳首九邊授伏玘正千戶世襲金千
兩三卒各百金官百戶

昭忠 附錄

杜國慶 原任山東沂州府遊擊康熙六年土賊作亂國慶力戰死之事平於嘉慶元年以恩騎尉世襲罔替

范銀 以左衛千總出征陝西死馬家灣之戰襲雲騎尉

姜雲 以河保營千總出征陝西死馬家灣之戰襲雲騎尉

劉鉞 以平魯營把總出征陝西死土地嶺之戰襲雲騎尉

馬勁 以得勝路把總出征陝西死秦嶺之戰襲雲騎尉

龐有倉 以得勝路鎮邊堡把總出征陝西死土地嶺之戰襲雲騎尉

師舉 以偏關營把總征陝西死法寶之戰襲雲騎尉

牛文光 以鎮標中營把總出征川楚死毛啞子之戰襲雲騎尉

康調元 以老營屬乃河堡把總出征陝西死池家河之戰襲雲騎尉

大同縣志

卷十五

武事

二十

董瑞 以歸化營多爾濟把總出征陝西死法寶之戰襲雲騎尉

畢振林 以鎮標中營把總出征陝西死獅子嶺之戰襲雲騎尉

